

Minister Benny Sevinger na apertura di Watertoren San Nicolas

“Den tur districto y tur barío di e pais aki nos ta yega y nos ta drecha”

E maestro di ceremonia a yam’e dilanti cu e siguiente palabranan ‘Esaki ta e minister cu ta ‘build things’, construi cosnan. Y esaki ta exactamente loke e minister aki ta para p’e tambe. Minister Benny Sevinger ta carga un responsabilidad clave den ehecucion di e vision di Gabinete Mike Eman. Como Minister di Infraestructura, supervisando casi 100 proyecto cu ta andando riba e isla, e restauracion y renobacion di Watertoren San Nicolas ta uno mas cu awor ta tras di lomba. Pesey ta cu hopi satisfaccion Minister Sevinger a hiba palabra durante e ceremonia di apertura indicando cu “Awe nos tur por ta contento cu nos ta para na un proyecto cu ta forma parti di un vision mas grandi.” Sevinger a añadi cu e desaroyo di Aruba no ta

enfoca djis riba e poblacionnan mas grandi manera Oranjestad y San Nicolas, pero cu ta cubri henter e teritorio nacional “Tur districto y tur barío di e pais aki nos ta yega y nos ta drecha,” el a bisa. E ta di opinion cu na Aruba lamentablemente a conoce hopi tempo caminda tabatin un bashi entre e desaroyo economico di e pais y su infraestructura. Bo ta tende cu e isla ta bay dilanti, pero esey no tabata refleha tur parti. Solamente un area di e isla tabata bay dilanti y esey tabata danki na inversionnan priva. Gabinete Mike Eman a reconoce e tendencia negativo ey y a fiha como meta cu ta henter e isla mester progresa. Inversion den infraestructura, segun Sevinger ta crea cuponan di trabou pa nos hendenan y tambe ta stimula e economia pa

medio di e diferente contratista y companianan local involvi. Ademá di esey, ta crea un miho clima pa nos ciudadanonan biba aden y nos por muestra nos bishitantenan cu nos ta un pais desaroya, ordena y dushi pa bishita. Minister Sevinger: “Awe bo ta mira con poco poco e puzzel ta coy forma paso ta un vision amplio e ta.” For di scolnan manera Abraham de Veerschool te na complehonan deportivo y recreativo manera Joe Laveist Sport Park y parke di Esso Ville y Lago Heights; for di edificionan publico manera ex-post di ambulans y e Facilidat Multi Funcional di San Nicolas te na e revitalisacion di barionan manera Village y Yuwana Morto, tur ta forma e bienestar di henter San Nicolas. “San Nicolas ta conociendo de-

saroyo. Esey ta loke e gobierno aki a priminti y esey ta loke e gobierno aki ta cumpliendo,” Sevinger a bisa na e publico na San Nicolas cu a bati man cu emocion. “Pero e puzzel ta mas grandi cu San Nicolas, e ta cubri henter e isla,” Minister Sevinger a sigui bisa indicando cu e vision cu Prome Minister Mike Eman tin pa e pais aki nos tur mester ta orguyoso di dje. “Nos cu ta traha cune sa di dje. Di e infraestructura, pero tambe di e parti social. Tur dia Prome Minister ta yama nos pa check con cosnan ta canando.” Tambe e titular di Infraestructura tabatin hopi elogio pa Mike de Meza kende ta “bolter e florin di tur banda pa paga loke mester, pero tambe ta consciente cu mester inverti pa stimula nos economia. Recordando cu Minister de Meza ta un habitante di San Nicolas, el a felicita e pueblo. “Boso tin un yiu cu ta traha duro pa boso. Boso tin un Prome Minister cu ta traha duro pa boso.” Minister Benny Sevinger, hunto



cu Minister de Meza y Prome Minister a pasa e switch cu a cende e luznan riba e Watertoren renoba. Di e manera ey e edificio a keda oficialmente re-inaugura y un proyecto mas a keda cla na beneficio di pueblo di San Nicolas y henter Aruba. Watertoren ta bay fungi como sede di un museo industrial caminda e companianan di utilidad local manera WEB, Elmar, Setar y Triple A lo expone nan historia y desaroyo.